

ԽՈՍՔ ՇՆՈՐՀԱՎՈՐԱՆՔԻ

Նայ Առաքելական Սուրբ Եկեղեցին բոլոր դարաշրջաններում բացառիկ ազդեցություն է ունեցել հայ ժողովրդի պատմական ընթացքի եւ պետականության կայացման վրա: Պետությունն ու Եկեղեցին պատմականորեն հանդես են եկել որպես մեկ միասնություն, եւ այդ փոխկապակցվածությունն իր կնիքն է դրել ազգային ինքնության եւ հոգեբանության վրա, դարձել ինքնագիտակցության կարեւոր բաղադրիչ: Պատմական որոշ փուլերում, երբ հայ ժողովուրդը կորցրել է պետականությունը, Եկեղեցին իր վրա է վերցրել մի շարք գործառույթներ՝ առաջնորդվելով ազգապահպանության վեհ գաղափարով: Եւ Եկեղեցու ջանքերը միշտ պսակվել են հաջողությամբ՝ առաջին հերթին հայրենանվեր եւ ազգասեր հայրապետների շնորհիվ:

Այսօր իրեն ժառանգված ազգային բարձրագույն արժեքների կրողն ու փոխանցողն Ամենայն Հայոց Կաթողիկոս Գարեգին Երկրորդն է: Նա անվարան առաջ է ընթանում այն ճանապարհով, որով անցել են երջանկահիշատակ իր նախորդները: Միեւնույն ժամանակ հայ ժողովրդի պատմության համապատկերում նա գծում է իր սեփական ուղին՝ իր ուրույն հետքը պատմության հոլովույթում եւ ազգային ինքնագիտակցության կերտման գործընթացում: «Մենք Քրիստոսի ժողովուրդ ենք, մեր հավատը, որ Քրիստոս հարություն է առել, անհուսությունը փոխում է հույսի, տկարությունը՝ ուժի, անտարբերությունը՝ նախանձախնդրության, արծաթսիրությունը՝ բարեգործության, ծառայությանն ու աշխատանքին միախառնում է նվիրումի ու հանձնառության ոգին: Այս փոխակերպությանն ենք կոչված, որով միայն կարող ենք անկորուստ պահել մեր երկիրն ու ազգային կյանքը եւ հաղթանակներ արձանագրել մեր ժողովրդի ու հայրենիքի բարօրության եւ առաջընթացի պայքարում», — ասված է Ամենայն Հայոց Կաթողիկոս Գարեգին Երկրորդի խոսքում:

Յուրաքանչյուր միտք պահանջում է անմնացորդ նվիրում, կամք, ապագայի նկատմամբ հավատք, որ գաղափարից վերածվի գործի: Ամենայն Հայոց Կաթողիկոսի տնօրինությամբ եւ օրհնությամբ իրագործված



բոլոր նախաձեռնություններում այս բոլոր բնութագրիչներն առկա են: Յուրաքանչյուրում արտացոլված է Վեհափառ Հայրապետի հետեւողական վերաբերմունքը, որը բխում է սեփական պետության եւ ժողովրդի նկատմամբ տածած անսակարկ եւ անսահման սիրուց եւ նվիրումից: Ամեն ինչ հայոց պետականության ամրապնդման, հայ ժողովրդի ապահով ու հուսալի ապագայի համար. ահա այն կարեւոր համոզմունքը, որով առաջնորդվում է Վեհափառ Հայրապետը յուրաքանչյուր օր:

Վեհափառ Հայրապետի տեսադաշտում են այն բոլոր բնագավառները, որոնք առնչվում են Հայ Առաքելական Եկեղեցուն: Բարեփոխումներից մինչեւ նոր ծրագրերի իրականացում, վերանորոգումից մինչեւ կառուցում, պահպանումից մինչեւ ստեղծում եւ հանրահռչակում. սա է Վեհափառ Հայրապետի ամենօրյա պրպտումների բովանդակությունը: «Միշտ հիշենք՝ միայն համախմբվածությամբ է հնարավոր իրագործել հզոր հայրենիքի մեր տեսիլքը, միայն օրինահարգությամբ, արդարասիրությամբ, ծառայանվիրումով, հանձնառություններով ու զոհողություններով կարող ենք ծաղկեցնել մեր կյանքը եւ ամուր ու հաստատուն պահել մեր պետականությունը»,— պատգամում է Վեհափառ Հայրապետը:

Այս տարի լրանում է Վեհափառ Հայրապետի ծննդյան 70-ամյակը: Շնորհավորում ենք Հայ Առաքելական Եկեղեցու առաջնորդի օրհնաբեր ծնունդը, մաղթում երկար տարիների քաջառողջ կյանք, ՇԻՆԱՐԱՐ եւ ՄԵԾԱԳՈՐԾ գաղափարներ ու իրականացումներ:

Տ. ԱՐԱՐԱՏ ՔԶՆ. ՊՈՂՈՍՅԱՆ

Ս. Էջմիածնի մատենադարանի եւ հրատարակչության տնօրեն

